

Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja

fax: + 387 33 552 810

selma@sogfbih.ba

• FINANSIJSKO SAVJETOVALIŠTE:

Dženita Kovačević, viši saradnik za finansijska pitanja

fax: + 387 33 552 810

dzenita@sogfbih.ba

Sadržaj biltena:

Održana Druga sjednica Predsjedništva Skupštine Saveza	1
Općine Glamoč i Doboj Jug dobile sredstva za rješavanje problema vodosnabdijevanja i otpadnih voda	1
Potpisan ugovor o zajmu za rekonstrukciju vodovodne i kanalizacione mreže u Cazinu	2
Vlada FBiH podržala inicijativu za razvoj sustava vodoopskrbe u Livnu	3
Općina Goražde pokrenula inicijativu za sticanje statusa grada	3
Općina Centar Sarajevo pomaže sanaciju saobraćajnica u Rogatici	4
Općina Gračnica u projektu prekogranične saradnje sa Hrvatskom	4
INTERVJU: Akif Fazlić, načelnik Općine Ilijaš	5
Gradonačelnik Grada Sarajeva predvodio delegaciju BiH u Kini	7
Sredstvima iz projekta prekogranične saradnje obnavljaju se gradski parkovi u Bihacu i Bosanskoj Krupi	8
INTERVJU: Jusuf Čavkunović, načelnik Općine Kladanj	8
LAF Study Tour on Anticorruption and conflict of interest	10

Bilten Saveza općina i gradova Federacije Bosne i Hercegovine

ODRŽANA DRUGA SJEDNICA PREDSJEDNIŠTVA SKUPŠTINE SAVEZA OPĆINA I GRADOVA FEDERACIJE BOSNE I HERCEGOVINE

U Sarajevu je, 03. jula/srpnja održana Druga sjednica Predsjedništva Skupštine Saveza općina i gradova Federacije BiH.

Na sjednici, članovi Predsjedništva su detaljno upoznati o nizu aktivnosti koje je Savez poduzeo u proteklom periodu a tiču se, prije svega izmjene zakonske regulative koja se odnosi na jedinice lokalne samouprave.

Predsjedništvo je razmatralo i usvojilo prijedlog Sporazum o saradnji između Parlamenta FBiH i Saveza. Predloženim Sporazumom očekuje se unapređenje saradnje Saveza sa zakonodavnim tijelom Federacije, te se oslanja na ranije potpisani Sporazum sa Vladom FBiH od 2011. godine.

Predsjedništvo je prezentorao prijedlog Plana rada Saveza za period 2013. – 2014. godina, koji je ažuriran na zajedničkoj sjednici komisija Saveza od 9. maja/svibnja 2013. godine, kao i izvještaji sa održanih sjednica skupštinskih komisija (Komisije za razvoj i unapređenje lokalne samouprave, Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša i Komisije za ekonomski razvoj općina i gradova i finansije), čiji zaključci i prijedlozi su jednoglasno usvojeni.

Predsjedništvo je također upoznato i o projektnim aktivnostima koje provodi Savez, i to: „Podrška savezima općina i gradova u BiH“ (AMCS), koji se provodi uz pomoć OSCE-a, Projekat „Načelnici za razvoj lokalne samouprave“, koji podržava Švicarski SDC, Projekat „Jačanje kapaciteta saveza općina i gradova u BiH“ – CDMA, koji podržava Švedska SIDA i Projekat „Podrška jačanju lokalne samouprave FBiH u pružanju efektivnijih i efikasnijih usluga“ koji Savez sprovodi u saradnji sa UNDP-om i to kroz tri projektne komponente - ILDP (Projekat integriranog lokalnog razvoja), MTS (Sistem obuke za jedinice lokalne samouprave) i LOD III (Jačanje lokalne demokratije/demokracije).

Predsjedništvo je raspravljalo i o drugim pitanjima koja su značajna i aktuelna za rad jedinica lokalne samouprave u Federaciji BiH.

Sjednici Predsjedništva Saveza prisustvovali su sljedeći načelnici: **Husejin Smajlović**, načelnik Općine Zenica, predsjednik Predsjedništva Saveza, **Agan Bunić**, načelnik Općine Bužim, **Muhamed Ramović**, načelnik Općine Goražde, g-din **Emir Bubalo**, načelnik Općine Konjic, **Rasim Omerović**, načelnik Općine Kalesija, **Amra Babić**, načelnica Općine Visoko, **Miroslav Lucić**, po ovlaštenju načelnika Općine Domaljevac-Šamac, **Katija Skočibušić**, po ovlaštenju načelnika Općine Tomislavgrad, **Đejna Sarač**, po ovlaštenju načelnika Općine Vogošća i **Edina Habibija**, po ovlaštenju načelnika Općine Novo Sarajevo.



Sa sjednice Predsjedništva - SARAJEVO, 03.07.2013.

OPĆINE GLAMOČ I DOBOJ JUG DOBILE SREDSTVA ZA RJEŠAVANJE PROBLEMA VODOSNABDIJEVANJA I OTPADNIH VODA

SARAJEVO, 3. juli/srpanj – Općine Glamoč i Doboj Jug dvije su nove općine kojim će posredstvom projekta Watsan biti riješen ili znatno umanjen problem vodosnabdijevanja i otpadnih voda i kanalizacije, a kojeg s Evropskom komisijom i Evropskom investicionom bankom implementira Federalno ministarstvo poljoprivrede, vodoprivrede i šumarstva.

"Ovim projektom rješavamo problem vodovodne i kanalizacione infrastrukture. Projekat bi u realizacijsku fazu trebao ući već u ovoj godini, a rok za završetak radova je 2014. godina. Vrijednost projekta je million eura, s tim da su inostrani partneri projekta odobrili oko 870.000 eura. Nedostajuća sredstva, Doboj Jug će pronaći posredstvom drugih izvora finansiranja", izjavila je načelnica Begić nakon potpisivanja ugovora kojim će Doboj Jug biti u prilici da koristi kreditna i grant sredstva ovog projekta.



Također, danas je i Općina Glamoč potpisala isti ugovor, a njen načelnik Radovan Marković je kazao da će nakon duže vremena i Glamoč riješiti problem vodosnabdijevanja.

"U Glamoču je u toku rekonstrukcija već postojećeg sistema, a ovim projektom biće riješena problematika novim korisnicima vodovoda. Glamoč je, u ljetnom periodu, već duži niz godina bez vode i nama ovaj projekat znači život i ono što se naziva održivim povratkom. Iznos kreditnog dijela je 1,5 miliona eura što je fiksni dio kredita. Odmah nakon

povratka iz Sarajeva, nakon potpisivanja ovog ugovora, raspisujemo javni poziv za izradu projektne dokumentacije, a nakon toga slijedi tender za izvođače radova. Startujemo već u ovoj godini kako bi radovi mogli biti okončani u narednoj", kazao je Marković.



Sa potpisivanja pristupanju WATSAN projektu, 03.07.2013.

POTPISAN UGOVOR O ZAJMU ZA REKONSTRUKCIJU VODOVODNE I KANALIZACIONE MREŽE U CAZINU



SARAJEVO, 2. juli/srpanj – Ministar finansija i trezora Nikola Špirić i predsjednik Evropske banke za obnovu razvoj (EBRD) Suma Čakrabarti potpisali su danas u Sarajevu ugovor o zajmu za rekonstrukciju vodovodne i kanalizacione mreže u općini Cazin.

Nakon potpisivanja, Špirić je rekao da je vrijednost ugovora pet miliona eura, grejs period tri godine, rok otplate 15 godina, a kamatna stopa iznosi 0,5 posto.

"Ova sredstva će biti praćena i grantovima Holandije od 3,5 miliona eura i Švedske od 2,5 miliona eura, čime će izgradnja vodovodne i kanalizacione mreže u Czinu biti riješena", kazao je Špirić.

Čakrabarti je naglasio kako vjeruje da će ovaj projekat temeljno i suštinski poboljšati kanalizacionu mrežu u općini Cazin, jer će riješiti postojeće probleme koji se odnose na prikupljanje i tretman otpadnih voda.

"Također, projektom želimo pomoći javnom komunalnom preduzeću da pređe na komercijalniji način poslovanja", naglasio je Čakrabarti.

Prema njegovim riječima, EBRD je do danas investirao oko 1,5 milijardi eura u BiH i najveći je investitor u zemlji.

"Prošle godine investirali smo 125 miliona eura u BiH, a ove godine očekujemo da taj iznos bude 150 miliona eura", rekao je Čakrabarti.

Istakao je da je na današnjem sastanku razgovarano i o novoj strategiji EBRD-a za BiH koja je u pripremi i obuhvatiće naredni trogodišnji period.

"U proteklih godinama više smo se fokusirali na obnovu zemlje, a složili smo se da se u budućnosti trebamo više posvetiti privatnom sektoru. Infrastruktura će i dalje ostati važna, ali će važan biti i razvoj malih i srednjih preduzeća", rekao je Čakrabarti.

Naveo je da će buduća strategija biti posvećena efikasnom i održivom korištenju resursa koje posjeduje BiH, ali da će jedna od glavnih odlika tog dokumenta biti osnaživanje veza unutar regiona i ekonomska integracija u regionu.

Kako je kazao Čakrabarti, na današnjem sastanku istaknuto je, između ostalog, da je imperativ privući što više investitora u BiH, ali i u region Zapadnog Balkana.

"Naš zajednički cilj je unaprijediti poslovno okruženje u BiH i Zapadnom Balkanu, što podrazumijeva rješavanje određenih pitanja koja predstavljaju prepreku investicijama", kazao je Čakrabarti.

Najavio je da je početkom naredne godine planirano održavanje regionalne investicijske konferencije koja će pokazati šta je moguće uraditi i u koje oblasti se može investirati u regionu Zapadnog Balkana.

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocenter.ba
www.balkanfund.org
www.eurelsmmed.com
www.eacea.ec.europa.eu



VLADA FBiH PODRŽALA INICIJATIVU ZA RAZVOJ SUSTAVA VODOOPSKRBE U LIVNU



SARAJEVO, 1. juli/srpanj – Vlada Federacije BiH je na današnjoj sjednici podržala inicijativu da se osiguraju kreditna sredstva kod Raiffeisen Zentralbank Osterrich za realizaciju Projekta "Razvoj sustava vodoopskrbe u općini Livno, faza II - Sjeverni krak", po Okvirnom sporazumu između Vijeća ministara BiH i Vlade Republike Austrije u iznosu od 3,5 miliona eura i prihvatila Informaciju o kreditu za ovaj projekt, kao osnovu za vođenje pregovora, saopćio je Ured za odnose s javnošću Vlade FBiH.

S obzirom na to da općina Livno ne posjeduje kreditnu sposobnost za predloženo kreditno zaduženje, Vlada Kantona 10 je donijela Zaključak kojim izražava svoju spremnost za zaduženje, a korisnik kredita je općina Livno, koja će biti zadužena za otplatu kredita.

Federalno ministarstvo finansija, Ministarstvo finansija Kantona 10 i Općina Livno obavezani su da u tim za pregovore o kreditu imenuju svoje ovlaštene predstavnike, a konačna odluka o zaduženju bit će donijeta po okončanju pregovora sa Raiffeisen Zentralbank Osterrich kojom će se utvrditi konačni uvjeti kreditnog zaduženja i alokacija kreditnih obaveza na krajnje dužnike.

Federalno ministarstvo finansija će Vladi podnijeti informaciju o pregovorima kao i tekst usaglašenog ugovora između Bosne i Hercegovine i Raiffeisen Zentralbank Osterrich.

Osnovni razlog za novo zaduženje je nezadovoljavajuće i neodrživo stanje u sektoru vodosnabdijevanja na području općine Livno. Postojeća vodovodna mreža je u veoma lošem stanju što predstavlja veliki problem, posebno tokom ljeta, kada su prekidi vodosnabdijevanja zbog štednje uobičajeni.

Pored toga, znatan broj stanovnika na području općine Livno nema pristup javnom sistemu vodosnabdijevanja, zbog čega je i obuhvat naplate manji.

Glavni cilj ovog projekta je da se dugoročno osiguraju uslovi kontinuirane i kvalitetne vodoopskrbe područja koje bi obuhvatio ovaj projekat, čime bi se znatno smanjili gubici u postojećoj vodovodnoj mreži, a stvorili bi se uslovi za priključenje novih korisnika na javni sustav vodoopskrbe, navodi se u saopćenju.

Osnovni razlog za novo zaduženje je nezadovoljavajuće i neodrživo stanje u sektoru vodosnabdijevanja na području općine Livno. Postojeća vodovodna mreža je u veoma lošem stanju što predstavlja veliki problem, posebno tokom ljeta, kada su prekidi vodosnabdijevanja zbog štednje uobičajeni.

OPĆINA GORAŽDE POKRENULA INICIJATIVU ZA STICANJE STATUSA GRADA

Federalno ministarstvo pravde pokrenulo je normativne aktivnosti vezane za proglašenje određenog broja Općina u status Grada. Općina Goražde na čelu sa načelnikom mr. Muhamedom Ramovićem pokrenula je neophodne aktivnosti kako bi dobila status Grada, navodi se na Općinskoj web stranici.

Osim Općine Goražde, u pomenutom procesu učestvuju i Općine Široki Brijeg, Travnik, Bihać, Zenica, Tuzla, Orašje i Livno.

Razlozi za donošenje ove Odluke proizilaze iz činjenice da Općina Goražde svakim danom teži ka tome da postane najrazvijeniji industrijski grad, sa sve većim brojem stanovnika, a i prisutni trendovi u Općini ukazuju na potrebu promjene statusa u Grad kao jedinicu lokalne samouprave sa jačim društvenim i političkim uticajem.

Odluka predstavlja prvi korak u proceduri uspostave Grada Goražda i na osnovu nje Federalni parlament treba donijeti Zakon kojim će biti uspostavljen Grad.

Status Grada za Goražde označava direktnu mogućnost pristupa Evropskim fondovima za razvoj gradova (Evropski fond za regionalni razvoj ERDF) čija sredstva iznose oko 300 miliona eura. Očekuje se da će dio ovih sredstava biti usmjeren u izgradnju infrastrukture neophodne za proširenje industrijskih zona i razvoj privrede Goražda. Goraždu bi status Grada omogućio da u budućnosti parira jakim centrima, ne samo u Bosni i Hercegovini, već i u regiji.



Osim Općine Goražde, u pomenutom procesu učestvuju i Općine Široki Brijeg, Travnik, Bihać, Zenica, Tuzla, Orašje i Livno.





Grbovi općina Centar Sarajevo i Rogatica



"Ideje su i ranije postojale ali sada želimo da i konkretizujemo stvari kada je u pitanju dobijanje statusa Grada. Naime, premijer Federacije BiH Nermin Nikšić i ministar pravde Zoran Mikulić pozvali su nas prije sedam dana na zajednički sastanak osam općina koje su sjedište kantona gdje su nam predložili da naše općine dobiju status grada. Naravno da smo prihvatili ideju, načelno je podržali i predložio sam Općinskom vijeću Općine Goražde da na devetoj redovnoj sjednici donese Odluku da budući status Općine Goražde bude status Grada Goražde. Višestruke su koristi jer status Grada bi nam dao prednosti prilikom kandidovanja projekata prema međunarodnim donatorima i prilikom stvaranja partnerstava sa gradovima u okruženju i šire. Osim toga, sa psihološkog aspekta gledano, sam naziv Grad Goražde će pozitivno djelovati na sve stanovnike, a čak i više za domaće i strane investitore. Obzirom da se radi o zaista bitnoj aktivnosti i da njenim završetkom naša jedinica lokalne samouprave stiže daleko bolji status i dobija na većem značaju kako unutar Bosne i Hercegovine, tako i u odnosima prema međunarodnim organizacijama i partnerima, smatramo da su aktivnosti po ovom pitanju hitne i prioritete." – naglasio je načelnik Općine Goražde, mr. Muahmed Ramović.

OPĆINA CENTAR SARAJEVO POMAŽE SANACIJU SAOBRAĆAJNICA U ROGATICI

Sarajevska Općina Centar izdvojila je iz budžeta 20.000 KM za sanaciju lokalnih puteva u Rogatici koji su oštećeni tokom prirodnih nepogoda.

Protokol o realizaciji granta potpisali su 26. juna/lipnja načelnici općina Centar i Rogatica, Dževad Bećirević i Tomislav Puhalc.

Načelnik Bećirević je kazao da je projekt izdvajanja finansijske pomoći za manje razvijene općine u BiH počeo prije nekoliko godina.

"Prve općine koje su dobile ovakvu našu pomoć su bile Bijeljina i Ravno. Svake godine nastavljamo s ovom tradicijom, a to smo i u mogućnosti jer se naš budžet stalno uvećava", kazao je Bećirević.

Načelnik Rogatice Tomislav Puhalc zahvalio je Općini Centar i načelniku Bećireviću na ovoj donaciji.

"Izdvojena sredstva planiramo iskoristiti za sanaciju lokalnih puteva od kojih neki povezuju povratnička naselja na području naše opštine. Nadam se da će saradnja s Općinom Centar biti nastavljena", rekao je Puhalc.



Sa potpisivanja protokola načelnika općina Centar Sarajevo i Rogatica

KORISNI LINKOVI ZA PREDPRISTUPNE FONDove EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc-bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

OPĆINA GRAČANICA U PROJEKTU PREKOGRANIČNE SARADNJE SA HRVATSKOM

TUZLA, 4. juli/srpanj – Danas je u Tuzli održana Uvodna konferencija projekta prekogranične saradnje BiH – Hrvatska „Zaštita prirode i globalizacija obnovljivih izvora energije – PROGRES“, navodi se na web stranici Općine Gračanica.

Riječ je o projektu kojeg implementira Udruženje za razvoj NERDA u partnerstvu sa Općinom Gračanica i Općinom Kalesija, te partnerima iz Hrvatske: Općina Nijemci, Razvojna agencija Vukovarsko-srijemske županije HRAST, EKO SUSTAV d.o.o. i Energetski institut „Hrvoje Požar“. Program je finansiran iz sredstava predpristupnog EU programa IPA, prekogranična saradnja BiH-Hrvatska.

O specifičnostima i značaju projekta PROGRES za ovu regiju ali i saradnju sa općinama iz susjedne Hrvatske, govorila je Amra Jaganjac, projekt menadžer ispred Udruženja NERDA. Projekat je započeo Potpisivanjem ugovora za provedbu projekta kojeg je Udruženje za razvoj NERDA potpisalo sa Delegacijom Evropske unije u BiH 17.05.2013. godine, a planirano je da njegova implementacija traje 18 mjeseci. Ukupna vrijednost projekta koji će se realizovati u bh prekograničnom području je 244.827,13 EUR od čega EU finansira 208.103,00 EUR što je 85% od ukupne vrijednosti projekta.

Među projektnim aktivnostima izdvajaju se izrada Studije o potencijalima za korištenje obnovljivih izvora energije, koju će za oba prekogranična područja izraditi partneri na projektu iz Energetskog instituta „Hrvoje Požar“ iz Zagreba, kao i demonstracijski objekti, dva u prekograničnom hrvatskom području i dva u pekograničnom bh području. Demonstracijski objekat za općinu Gračanica bit će Sportska dvorana „Luke“, na koju će biti postavljeni solarni paneli i fotonaponske ćelije.



Sa konferencije predstavljanja projekta

INTERVJU: AKIF FAZLIĆ, NAČELNIK OPĆINE ILIJAŠ

Razgovarala: Alisa DRECA

SARAJEVO, 1. JULA (ONASA) - Načelnik Općine Ilijaš Akif Fazlić u intervjuu za Agenciju ONASA govori, između ostalog, o radu Općine u prvoj polovini ove godine, najznačajnijim realiziranim projektima, ekonomskoj situaciji na području općine, privlačenju novih investitora, planovima za naredni period...

ONASA: Kako ocjenjujete rad Općine Ilijaš u prvoj polovini ove godine i koji su problemi s kojima se Općina najviše susretala u tom periodu?

FAZLIĆ: U skladu sa općim društvenim prilikama i trenutnim makroekonomskim ambijentom, rad Općine Ilijaš u prvoj polovini 2013. godine ocjenjujem uspješnim. Problemi sa kojim se Općina najviše susretala i koji su sigurno aktuelni i za druge lokalne zajednice u BiH generalno su ti da je fiskalna pozicija Općine neadekvatna u odnosu na stvarne potrebe građana, nisu jasno definisane nadležnosti po nivoima vlasti, a prenos nadležnosti viših nivoa vlasti na lokalne zajednice se odvija bez prenosa adekvatnih sredstava za obavljanje povjerenih nadležnosti. Istovremeno, izražen je problem zakonodavnog okvira u smislu nepostojeće, nekompletne ili neadekvatne sistemske zakonske regulative u strateškim razvojnim segmentima, kao što je oblast šumarstva – Zakon o šumama, oblast obnovljivih izvora energije, oblast razvoja privrednih zona, zakonodavni okvir koji reguliše stvarna prava, kao što je pravo gradnje i slično, te oblast planiranja ekonomskog razvoja, zaštite životne sredine...



Akif Fazlić, načelnik Općine Ilijaš

ONASA: Koji su kapitalni projekti koje je općinska vlast uspjela realizirati u proteklom periodu?


FAZLIĆ: Na teritoriji općine Ilijaš u proteklom kratkoročnom periodu je realiziran relativno veliki broj projekata manje ili veće vrijednosti, od kojih prema kriteriju vrijednosti investicionog ulaganja možemo izdvojiti Pješačku zonu Ilijaš u vrijednosti od 1.115.000 KM, izgradnju modernog objekta Osnovne škole u Starom Ilijašu, zatim izgradnju servisne saobraćajnice u Podlugovima u vrijednosti od 800.000 KM, a koja je u toku. Od kapitalnih projekata izdvajaju se i izgradnja objekta primarne zdravstvene zaštite – Ambulanta Mrakovo i prostorija MZ "Mrakovo" u vrijednosti od 350.000 KM, regulacija korita rijeke Rače u vrijednosti od 160.000 KM, utopljanje zgrade dječijeg vrtića u Ilijašu u vrijednosti od 85.000 KM i izgradnja vodoopskrbnog sistema - vodovod Bioča u vrijednosti od 185.000 KM.

ONASA: Kako ocjenjujete trenutnu ekonomsku situaciju na području općine Ilijaš i koje korake poduzimate s ciljem smanjenja stope nezaposlenosti?

FAZLIĆ: Općina Ilijaš, kao i većina drugih lokanih zajednica u BiH, susreće se sa snažnim ekonomskim problemima koji su uglavnom izazvani općim makroekonomskim prilikama kojima su izložena šira društvena zajednica, država i region. Kao krucijalni problem se nameće visoka stopa nezaposlenosti koja je prvenstveno opći socijalni, ali svakako i ekonomski problem na koji pokušavamo pozitivno uticati u skladu sa povjerenim nadležnostima i realnim mogućnostima lokalne zajednice.

Prvenstveno naše djelovanje u ovom kontekstu se može klasificirati kroz više mjera i programa koje nastojimo da provedemo, a kojim stimuliramo rast makroekonomskih pokazatelja lokalne zajednice. To su: jačanje saradnje lokalne zajednice sa privrednim sektorom s ciljem stvaranja boljeg poslovnog ambijenta na teritoriji općine Ilijaš, aktivna uloga lokalne zajednice u promovisanju općih vrijednosti i konkurentskih prednosti mikrolokaliteta, te aktivna uloga lokalne zajednice u privlačenju domaćih i inostranih investitora. Stimulativne mjere provodimo i kroz projekte poljoprivrednih poticaja, zatim nagradu za poslovne ideje mladih, stimulacije razvoja "start up" biznisa, stvaranja povoljnog ambijenta za razvoj malog i srednjeg poduzetništva, te projekat uspostave nove Industrijske zone "Luke" Ilijaš.

Osim navedenih ograničavajućih faktora razvoja, općina Ilijaš za razliku od drugih lokalnih zajednica u proteklom periodu ipak bilježi porast gotovo svih makroekonomskih pokazatelja. Naročito je pohvalno da općina Ilijaš ima konstantan rast izvoza, u većini proteklih godina apsolutnu pokrivenost uvoza izvozom, te uzimajući u obzir broj stanovništva, relativno veliko učešće u ukupnom izvozu Federacije BiH, koje trenutno iznosi 1,97 posto.



Grb Općine Ilijaš

"...izražen je problem zakonodavnog okvira u smislu nepostojeće, nekompletne ili neadekvatne sistemske zakonske regulative u strateškim razvojnim segmentima, kao što je oblast šumarstva – Zakon o šumama, oblast obnovljivih izvora energije, oblast razvoja privrednih zona, zakonodavni okvir koji reguliše stvarna prava, kao što je pravo gradnje i slično, te oblast planiranja ekonomskog razvoja, zaštite životne sredine..."



Ilijaš, trg

**KORISNI LINKOVI ZA PREDPRISTUPNE
FONDOVE EU:**

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemed.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu



Ilijaš

ONASA: Koji su privredni subjekti nosioci razvoja Općine i šta općinska vlast čini kako bi privukla investitore (domaće i inostrane)?

FAZLIĆ: Nosioci privrednog razvoja na teritoriji općine Ilijaš su uglavnom mala i srednja preduzeća koja zapošljavaju do 250 zaposlenih. U njima se praktično odvija više od 90 posto ukupnih privrednih aktivnosti, a to su pretežno proizvodni privredni subjekti, privredni subjekti iz oblasti građevinarstva i pratećih usluga, te oblasti poljoprivredne proizvodnje, a ostatak su uglavnom trgovinska i preduzeća koja se bave pružanjem usluga. U oblasti industrijske proizvodnje izdvajamo privredne subjekte iz oblasti metaloprerađivačke i drvoprerađivačke industrije, a u posljednje vrijeme se javlja određeni broj privrednih subjekata koji se bave preradom poljoprivrednih proizvoda.

Općina Ilijaš preuzima aktivnu ulogu u privlačenju domaćih i inostranih investitora primjenjujući set mjera kojima će se zasigurno u budućem periodu osigurati investicije na teritoriji općine.

Jedna od tih mjera je uspostava aktivne saradnje sa nadležnim državnim i međunarodnim razvojnim institucijama i organizacijama koje na direktan način mogu pomoći u procesu obezbjeđenja investicijskih ulaganja na području šire zajednice, samim tim i na području teritorije općine Ilijaš, kao što su: Državna agencija za promociju stranih investicija (FIPA), Ministarstvo privrede Kantona Sarajevo i ostala nadležna kantonalna ministarstva, Federalno ministarstvo razvoja, poduzetništva i obrta, Sarajevska regionalna razvojna agencija (SERDA), te veliki broj međunarodnih organizacija koja se bave problematikom lokalnog razvoja kao što su Deutsche Gesellschaft f=FCr Internationale Zusammenarbeit (GIZ), Regional Environmental Center (REC).

Mjere osiguranja investicija su i izgradnja poduzetničke infrastrukture, prvenstveno razvoj nove industrijske zone, Industrijska zona "Luke" Ilijaš na površini od 16,6 hektara, sa 50 novih investicijskih lokacija, ukupne bruto građevinske površine od 161.767 metara kvadratnih, procijenjene infrastrukturne vrijednosti od oko 11.000.000 KM, zatim stimulativne mjere za razvoj malog i srednjeg poduzetništva i podsticaj poljoprivredne proizvodnje, te jačanje saradnje sa postojećim privrednim subjektima na teritoriji općine s ciljem rješavanja postojećih disfunkcionalnosti i stvaranja boljeg poslovnog ambijenta za rast i razvoj aktivnih poslovnih subjekata, kao i povećanje brzine pružanja općinskih usluga na zahtjev poslovnih subjekata ili investitora u općini Ilijaš.

ONASA: Koje grane privrede imaju najveće potencijale za ulaganje?

FAZLIĆ: Mi smo u proteklom periodu identificirali perspektivne oblasti za ulaganje na teritoriji općine Ilijaš, u kojim naša lokalna zajednica zasigurno ima komparativne prednosti u poređenju sa drugima. To su privredne grane za čiji razvoj općina ima prirodne potencijale ili ipak tradiciju bavljenja konkretnom granom privrede, a u tom smislu prvenstveno izdvajamo metaloprerađivačku, drvoprerađivačku i prehrambeno-prerađivačku industriju, poljoprivrednu proizvodnju, turizam, te potencijalno za općinu Ilijaš neke nove industrijske grane kao što je farmaceutska industrija.

Perspektivne oblasti za ulaganje su i sve radnointenzivne djelatnosti kao što je tekstilna industrija, zbog radne snage čija je cijena značajno niža od prosječne u Kantonu Sarajevo, ali i zbog izuzetno povoljnog geostrateškog položaja, veličine tržišta (neposredna blizina Sarajeva i Zenice kao dva velika bh. grada), privredni kapacitet sarajevske makroregije, nezagađena životna sredina, prirodni resursi (naročito šume, voda i sl), kvalitetna i jeftina radna snaga, industrijska tradicija, Koridor 5c, postojeća željeznička infrastruktura, blizina Međunarodnom aerodromu u Sarajevu, relativna blizina morskoj luci Ploče, efikasna lokalna samouprava, niže cijene nekretnina u poređenju sa prosječnim cijenama u Kantonu Sarajevo, ekspanzija razvoja poljoprivredne proizvodnje, turizma...

Navedeno će općinu Ilijaš ubuduće zasigurno činiti jednom od najatraktivnijih investicijskih destinacija u BiH.

ONASA: Kakva je Vaša saradnja sa višim nivoima vlasti i koliko ste zadovoljni izdvajanjem njihovih sredstava za Općinu Ilijaš?

FAZLIĆ: Opća ocjena je da je saradnja Općine Ilijaš sa višim nivoima vlasti na zadovoljavajućem nivou, u posljednje vrijeme je intenzivirana u većoj mjeri, a primjetan je porast zainteresiranosti viših nivoa vlasti u kontekstu stvaranja boljeg ambijenta za ekonomski razvoj naše lokalne zajednice, ali i u oblasti razvoja društvene infrastrukture i drugih kapitalnih ulaganja.

U smislu osiguranja finansijskih sredstava za razvoj velikih kapitalnih projekata i dalje je, nažalost, izražen problem osiguranja značajnih sredstava viših nivoa vlasti, tako da ubuduće moramo svi zajedničkim snagama biti više proaktivni s ciljem jačanja ukupnog budžetskog potencijala, kako bismo za sve građane osigurali dostojanstven život i sigurnu egzistenciju.



ONASA: Kako ocjenjujete postojeći sistem socijalne zaštite na području općine Ilijaš, te koji su najznačajniji projekti koje je Općina realizirala i planira realizirati u ovoj oblasti?

FAZLIĆ: Postojeći sistem socijalne zaštite funkcioniše na principu participacije velikog broja subjekata koji se direktno ili indirektno bave rješavanjem socijalne problematike građana, od kojih izdvajamo JU Centar za socijalni rad Kantona Sarajevo, Općinu Ilijaš, putem nadležne Službe za boračko - invalidsku zaštitu, socijalnu zaštitu i raseljena lica, te posebnih organizacija kao što su općinska organizacija Crvenog križa FBiH, Muslimansko dobrotvorno društvo "Merhamet" i druge vladine i nevladine institucije, udruženja građana i organizacije koje se bave ovom problematikom.

U tom kontekstu trenutno egzistira veći broj programa ili mjera socijalne zaštite, od kojih se mogu izdvojiti kontinuirani programi zaštite porodice sa djecom (dječiji doplati, prava i naknade porodičama, zdravstvena zaštita djece sa posebnim potrebama, zaštita civilnih žrtava rata – lična i porodična invalidnina i zdravstvena zaštita civilnih žrtava rata).

Svake godine budžetom Općine se planira određen iznos sredstava za ove namjene koja se raspoređuju u skladu sa važećim Odlukama i Pravilnikom Općinskog vijeća Ilijaš kojim su definirani uslovi za ostvarenje prava iz oblasti socijalne zaštite građana općine, uzimajući u obzir kriterij prioriteta zahtjeva kojeg ocjenjuje posebna komisija koju je formiralo OV Ilijaš.

ONASA: Na čemu će biti akcenat rada Općine u narednom periodu, odnosno čemu ćete posebno posvetiti pažnju kao prvi čovjek izvršne vlasti u Općini Ilijaš?

FAZLIĆ: Akcenat mog i angažmana općinskih službi su prvenstveno građani općine Ilijaš, ostalo su samo mjere, programi i projekti kojima pokušavamo da osiguramo njihov bolji životni standard i kvalitet pruženih usluga u svim oblastima od socijalne i zdravstvene zaštite, administrativnih usluga do kvalitete obrazovanja i osiguranja zaposlenja, formiranja održivog domaćinstva i stabilne porodice.

Navedeno u većoj ili manjoj mjeri možemo ostvarivati samo na način da ravnomjerno utičemo na razvoj svih segmenata društva, ekonomskog i društvenog razvoja, te zaštite i unapređenja životne sredine i razvoja kvalitetne infrastrukture. U svom radu naročito ističem bitnost efikasnosti rada lokalne administracije, značaj razvoja male i srednje privrede, jačanje saradnje i razmjene iskustava sa međunarodnim institucijama, drugim lokalnim zajednicama i višim nivoima vlasti, te jačanje svijesti i osiguranja investicija u obnovljive izvore energije i zaštitu životne sredine.

GRADONAČELNIK SARAJEVA PREDVODIO DELEGACIJU BIH U KINI

Gradonačelnik Sarajeva Ivo Komšić predvodio je delegaciju Bosne i Hercegovine i Grada Sarajeva tokom međunarodnog Susreta lokalnih lidera Kine i zemalja srednje i istočne Evrope – Chongqing 2013, koji se 4. jula/srpnja 2013. godine okončao u kineskom gradu Chongcingu (Chongqing), navodi se na web stranici Grada Sarajeva.

Delegacija Grada Sarajeva u čijem sastavu su bili i Semir Efendić, načelnik Općine Novi Grad, Elvis Kondžić, savjetnik gradonačelnika za međunarodnu saradnju i evropske integracije i Amel Kovačević, koordinator projekta i bivši ambasador BiH u NR Kini, vodila je niz razgovora sa predstavnicima kineskih investitora i investicionih institucija.

Gradonačelnik Komšić je državnim institucijama i investitorima prezentirao razvojne projekte Grada Sarajeva kao i mogućnosti i razloge zbog kojih vrijedi ulagati u Sarajevo i BiH. Ukazujući u svom obraćanju na vrijednosti kulture i suživota u bh. prijestolnici, Komšić je pozvao kineske turističke institucije i turiste da posjete Sarajevo, s obzirom da je: "kultura veoma često prethodnica dobrim privrednim odnosima".

Kao učesnici Konferencije, pored političkih predstavnika gradova i lokalnih zajednica, svoje štandove u sajamskom prostoru ovog međunarodnog skupa, imale su i 16 zemalja srednje i istočne Evrope te 16 kineskih provincija. Pored Grada Sarajeva, na štandu BiH, svoju ponudu i projekte prezentirali su Grad Banja Luka te privrednici iz Sarajeva, Banja Luke i regije Mostara. Kineska strana je iskazala interesovanje da, uspostavljajući saradnju sa predstavnicima gradova i općina u BiH, investira u privredne i industrijske zone te da kooperira u oblastima: turizma, poljoprivrede, drveno-prerađivačke industrije, vinarstva i energetike.

Također, Sekretarijat za saradnju NR Kine sa 16 zemalja srednje i istočne Evrope osniva jedan od najvećih svjetskih fondova u iznosu od preko 10 milijardi USD namijenjen za investicije u ovim zemljama. Stoga su mnoge kineske institucije i privrednici, ali i lokalni lideri, izrazili želju da što prije razmjene informacije o projektima, dođu u Sarajevo i razgovaraju o mogućnostima kako da dio gore navedenog iznosa realiziraju u BiH i Sarajevu.

Tokom ovih susreta, gradonačelnik Komšić je razgovarao i sa zamjenikom ministra vanjskih poslova NR Kine i generalnim sekretarom Sekretarijata za saradnju NR Kine sa 16 zemalja srednje i istočne Evrope, g. Song Tao, i gradonačelnikom grada domaćina Congcinga, g. Huang Kifan, s ciljem uspostavljanja saradnje i sa drugim gradovima i institucijama NR Kine, koji su spremni ulagati u Sarajevo i BiH. Rezultat tih razgovora je i potpisivanje Sporazuma između



Ilijaš panorama



Sa potpisivanja Sporazuma između Grada Congcinga i Grada Sarajeva



Grada Conginga i Grada Sarajeva o uspostavljanju prijateljskih kooperativnih odnosa. Posjetu Kini delegacija Sarajeva je iskoristila i za susret sa pobratimskim gradom Tijencinom na kojem je dogovoreno da Grad Sarajevo u što skorije vrijeme dostavi konkretne prijedloge projekata koji mogu biti realizirani na obostrano zadovoljstvo, a počevši od kulture, turizma, preko obrazovanja do privrede i investicija u privredu.

SREDSTVIMA IZ PROJEKTA PREKOGRANIČNE SARADNJE OBNAVLJAJU SE GRADSKI PARKOVI U BIHAĆU I BOSANSKOJ KRUPI

Potpisivanjem Memoranduma o razumijevanju između projektnih partnera, 1. jula/srpnja je ozvaničen početak realizacije još jednog zajedničkog prekograničnog projekta, u kojem učestvuju Zadar i Zadarska županija, i općine Bihać i Bosanska Krupa, objavljeno je na bihac.org.

Riječ je o projektu "Zeleni otoci", čija je vrijednost u BiH 207.035 EUR, dok se u Hrvatskoj implementira 313.921 EUR.

Memorandum su juče u Zadru potpisali Emdžad Galijašević, načelnik Općine Bihać, Rudolf Dvorski, dožupan Zadarske županije, Ivica Vlakić, dogradonačelnik Zadra, Miro Đinđić, direktor Javne ustanove za upravljanje zaštićenim dijelovima prirode Zadarske županije, Zrinka Delić, direktorica "Plod Centra" i predstavnik općine Bosanska Krupa.

„Nakon uspješno odrađenog projekta Una–izvor života, Općina Bihać nastavlja sa implementacijom još jednog projekta sa našim prijateljima iz Zadra i Zadarske županije. Ovo je najbolji primjer kako surađuju gradovi i županije sa obje strane granice. Ovaj projekat predviđa revitalizaciju gradskih parkova i zelenih površina u Bihaću i Bosanskoj Krupi i to je za obje općine izuzetno bitno jer imaju najljepše parkove i najljepšu rijeku Unu“, kazao je načelnik Galijašević.

INTERVJU: JUSUF ČAVKUNOVIĆ, NAČELNIK OPĆINE KLADANJ

Razgovarao: Adis BRDARIĆ

SARAJEVO, 25. JUNA (ONASA) - Načelnik Općine Kladanj Jusuf Čavkunović u intervjuu za Agenciju ONASA, između ostalog, govori o radu lokalne vlasti u ovoj općini, problemima s kojima se susreće, ekonomskoj situaciji u općini, privrednim potencijalima, turizmu, stepenu zaposlenosti, stranim ulaganjima...

ONASA: Na čemu će biti akcenat rada lokalne vlasti u Kladnju u narednom periodu?

ČAVKUNOVIĆ: U narednom periodu glavne aktivnosti će biti usmjerene na infrastrukturne projekte, što je i osnovna nadležnost Općine. Prije svega, to je oblast vodosnadbijevanja i komunalnih djelatnosti, naročito prikupljanje smeća. Danas smo u situaciji da s jednim komunalnim vozilom, koje je staro više od 20 godina, prikupljamo smeće na području cijele općine, koja je teritorijalno jedna od najvećih na Tuzlanskom Kantonu (TK) i prostire se na 325 kvadratnih kilometara.

Također, jedan od glavnih aktivnosti biće stvaranje ambijenta za razvoj privrede. To je lako reći, ali zaista trebamo poduzeti niz mjera, prije svega u okviru lokalne administracije, a onda imati dobru ideju. Nadam se da ćemo uspjeti u toku ove godine napraviti prvi simbolični korak, a to je da na području naše lokalne zajednice uredimo jedan inkubacioni centar gdje bi mladim ljudima obezbijedili prostor da se samostalno bave biznisom.

Također, radit ćemo i na uspostavljanju industrijske zone. Općina u ovom momentu nema građevinskog zemljišta za ove namjere. S jedne strane, najšumovitija smo općina i napraviti pretvorbu šumskog u građevinsko zemljište je čitava nauka, a s druge strane imamo potrebu za stvaranje preduslova za razvoj privrede. Ipak, nećemo odustati od ove ideje i cilj nam je uspostavljanje industrijske zone od 20 hektara. U tom smislu, već smo u fazi pripreme dokumentacija za pretvorbu.

ONASA: Koji su najčešći problemi s kojima se suočava općina Kladanj?

ČAVKUNOVIĆ: Općina Kladanj je teritorijalno jedna od najvećih na TK, s relativno malo stanovnika, između 13 i 15 hiljada. To znači da na terenu imamo veliku razrijeđenost stanovništva i, samim tim, dosta problema oko održavanje infrastrukture, prije svega putne.

Također, imamo i komunalnih problema, kao i problema u vodosnadbijevanju. Prošle godine stanovnici užeg dijela općine Kladanj su šest mjeseci bili pod najrigoroznijom redukcijom gdje su samo dva sata imali vodu za piće. Pokušat ćemo animirati i lokalne investitore da ovu oblast u narednom periodu uredimo. Već je nešto urađeno na sanaciji sekundarne mreže s namjerom da smanjimo gubitke, ali tu ima još dosta posla.



Jusuf Čavkunović, načelnik
Općine Kladanj

KORISNI LINKOVI ZA PREDPRISTUPNE FONDOVE EU:

www.southeast-europe.net
www.adriaticpacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmed.eu
www.tacso.org
www.euroinfocentar.ba
www.balkanfund.org
www.eurelsmem.com
www.eacea.ec.europa.eu



Ono što je posebno obeshrabrujuće su usporene privredne aktivnosti koje su uzrokovane deficitom općinskog budžeta. Godišnji budžet Općine Kladanj iznosi oko 3,5 miliona KM, a akumulirani dugovi danas iznose između četiri i pet miliona KM. Nažalost, Općina Kladanj je na nepopularnoj listi dužnika kod Porezne uprave FBiH i to je loš signal. Nastojajući u narednom periodu da iskoristim Zakon o otpisu zateznih kamata i kreditno se zadužiti kako bi platili glavnicu.

ONASA: Kako bi ste ocijenili trenutnu ekonomsku situaciju na području općine?

ČAVKUNOVIĆ: Privredne aktivnosti općine Kladanj uvijek su bile naslonjene na prirodne, prije svega, šumske resurse. Nekada je na ovom području egzistirao i rudnik magnezita. Trenutno smo u fazi objave drugog Javnog poziva za prodaju ovog rudnika. Nadam se da će biti zainteresovanih za privatizaciju. Nekada je taj privredni kolektiv zapošljavao oko 100 ljudi i imao izuzetno kvalitetnu rudu. Nažalost, danas najveći dio velike industrije u oblasti drvoprerađivanja je propao, ali zadnjih godina imamo značajna privatna preduzeća.

Imamo jedan veliki privatni subjekt koji radi za svjetski poznatu kompaniju IKEA i on zapošljava oko 350 osoba. Jedna od privrednih aktivnosti koja je ostala nezapažena je autotransport kojim se dosta ljudi u općini bavi. Više od 100 vozničkih jedinica i 200 zaposlenih je angažovano u ovom sektoru međunarodnog transporta.

Što se tiče poljoprivrede, pokušavamo udružiti proizvođače i nadam se da ćemo u narednom periodu povratiti povjerenje u sistem zadugarstva i da će se stanovnici aktivnije početi baviti ovom djelatnošću. Poslije rata se pokušalo baviti otkupom mlijeka, međutim otkupljivači su bili nekorektni i ostali dužni stanovnicima, tako da je veoma teško vratiti povjerenje. U tom smislu i lokalna administracija će se uključiti u ovaj proces tako da i onaj ko dobije pravo za otkup, morat će garantirati da će plaćati robu.

ONASA: Jeste li zadovoljni stepenom zaposlenosti na području općine Kladanj i šta općinska vlast radi na povećanju zaposlenosti, posebno mladih i obrazovanih kadrova?

ČAVKUNOVIĆ: U općini Kladanj, nažalost, nezaposlenost je visoka u odnosu na broj stanovnika. Zaposlenih ima oko 2.000, od čega više od polovine u javnom sektoru. U realnom sektoru zaposleno je oko 1.200 osoba. Broj nezaposlenih, s obzirom na neuređenost tržišta, u smislu sive ekonomije, je relativan. Na evidenciji Zavoda je više od 3.000 nezaposlenih.

ONASA: Općina Kladanj ima veliki turistički potencijal. Šta u tom smislu lokalne vlasti rade kako bi što bolje bio iskorišten?

ČAVKUNOVIĆ: Kada se kaže Kladanj, misli se na planinu Konjuh i Muške Vode. Mi prema kompleksu Muške Vode imamo započet dio puta koji je tokom rata prehranio cijeli TK i bio jedina veza s jugoistočnom Bosnom. Iskoristit ćemo sva sredstva pozitivnog pritiska na kantonalnu i federalnu vladu da nam pomognu da ovaj put uspostavimo u cijeloj dužini od još deset kilometara i da stvorimo preduslove za razvoj turizma na ovom prostoru.

Odgovorno tvrdim da će izgradnja ovog puta doprinijeti razvoju turizma više nego sve ovo što radi Turistička zajednica TK i ostali turistički djelatnici. Osim prirode, Kladanj, nažalost, vrlo malo može ponuditi potencijalnim gostima zbog neizgrađene infrastrukture. Nadam se da će na području općine svi skupa imati osjećaj za razvoj sektora turizma.

Nakon 40 godina, prije mjesec dana, jedan investitor je upisao koncesiono pravo za pakovanje Muške Vode za flaširanje. Ta procedura je trajala više od deset godina i nadam se da će u narednom periodu ići znatno brže. TK ima Zakon o koncesijama i Zakon o javno privatnom partnerstvu koji je nedavno usvojen. Mi ovaj zakon razmatramo i u okviru njega pokušavamo naći prostor da intenzivnije idemo u aktivnosti jačanja privrede.

ONASA: Koje grane privrede, osim turizma, imaju potencijal za ulaganje i šta Općina planira učiniti kako bi privukla investitore?

ČAVKUNOVIĆ: Spomenuo bih jedan dio prerađivačke industrije, rudnik magnezita, a nadam se da će flaširanje Muške Vode doprinijeti jačanju privrede na ovom području.

ONASA: Kakvi su trendovi, odnosno da li imate najave otvaranja novih privrednih subjekata u općini?



ČAVKUNOVIĆ: Nažalost, veoma je puno ograničenja koja bi omogućila snažniji rast. Ako investitoru ne možemo omogućiti osnovne preduslove za razvoj privrede, konkretno građevinskog zemljišta u industrijskoj zoni, teško je očekivati poboljšanje u bilo kojem smjeru. Nadam se da ćemo stvaranjem ovih pretpostavki, odnosno izgradnjom industrijske zone, omogućiti značajnija ulaganja potencijalnim investitorima. Zadnjih godina nema puno interesa za velika investiranja. I domaći privrednici, zbog ekonomske krize, ulažu prilično oprezno.

ONASA: Ko su nosioci privrednog razvoja općine Kladanj?

ČAVKUNOVIĆ: U oblasti drvne industrije to je firma "Rameks", zatim Šume TK, preduzeće koje gazduje šumama u TK. Imamo, također, ozbiljnih firmi u oblasti tekstilne industrije kao što je firma "Integral Ferkol", a u oblasti međunarodnog transporta imamo pet-šest veoma stabilnih firmi koje zapošljavaju od 20 do 50 osoba.



Grb Općine Kladanj



Kladanj

**Savez općina i gradova Federacije
Bosne i Hercegovine**

Musala 5/1
71 000 Sarajevo

Phone: ++387 33 216 502, 209 024, 209 120

Fax: ++387 33 552 810, 552 811

E-mail: dino@sogfbih.ba

Nađite nas na facebook-u



POSJETITE NAS NA WEB-U

www.sogfbih.ba

LAF STUDY TOUR ON ANTICORRUPTION AND CONFLICT OF INTEREST

U okviru programa Local Administration Facility (LAF) organizuje se studijska posjeta Briselu pod nazivom „Antikorupcija i sukob interesa“ (LAF Study Tour on Anticorruption and conflict of interest) koja će trajati 11. - 13. septembra/rujna 2013. godine. Cilj studijskog putovanja je pružiti priliku lokalnim i regionalnim predstavnicima za upoznavanjem i razmjenom ideja u vezi sa EU procedurama i praksom u navedenoj oblasti.

Studijsko putovanje je otvoreno za učesnike iz Zapadnog Balkana (Albanija, Bosna i Hercegovina, Hrvatska, Kosovo, Makedonija, Crna Gora i Srbija) i Tursku. Maksimalno po pet učesnika može biti izabrano iz svake od odabranih zemalja.

Aplikacija treba da sadrži popunjen prijavni formular, pismo interesa i CV. Zainteresovani kandidati treba da pošalju CV i pismo motivacije (sa detaljima njihovog obrazovanja i profesionalnog iskustva i na koji način će dalje da prenose informacije sa ovog studijskog putovanja). Prvi pregled pristiglih aplikacija obaviće EU Delegacija u BiH. Aplikacije treba da se šalju na adresu: DELEGATION-BIH-TAIX@eeas.europa.eu

Izbor kandidata vršiće Generalni direktorat za proširenje zajedno sa program menadžerima Delegacije Evropske Unije u BiH.

Jezik studijskog putovanja je engleski pa je stoga aktivno znanje engleskog jezika preduslov za učešće. Učesnici će biti direktno kontaktirani od strane kancelarije Generalnog direktorata za proširenje, pa stoga je bitno da kandidati navedu direktan broj telefona u prijavnom formularu. Znanje engleskog jezika je važno zbog praktičnih vježbi gdje će biti traženo učešće svih polaznika. Studijska posjeta organizuje se za učesnike koji nisu do sada bili dio LAF događaja ove vrste.

Krajnji rok za podnošenje prijava je 1. avgusta/kolovoza 2013. godine.

U slučaju da imate bilo kakvih pitanja u vezi sa aplikacijom, molim Vas kontaktirajte gđu. Esmiru Kešan na: esmira.KESAN@eeas.europa.eu

Prijavni obrazac, dnevni red i vodič za učesnike možete preuzeti na web stranici Saveza općina i gradova FBiH u meniju vijesti (<http://www.sogfbih.ba/index.php?lang=ba&sel=94&view=6943>)

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

